



SIARAN MEDIA

KEMENTERIAN PERALIHAN TENAGA DAN TRANSFORMASI AIR (PETRA)

LAWATAN RASMI YAB TIMBALAN PERDANA MENTERI MERANGKAP MENTERI PETRA KE REPUBLIK RAKYAT CHINA BERMULA PADA 16 SEHINGGA 23 SEPTEMBER 2025

PUTRAJAYA, 16 September 2025 – YAB Dato' Sri Haji Fadillah bin Haji Yusof, Timbalan Perdana Menteri Malaysia merangkap Menteri Peralihan Tenaga dan Transformasi Air (PETRA) akan menghadiri undangan ke **21st China–ASEAN Expo (CAEXPO)** di Nanning, Guangxi, sebuah platform perdagangan dan pelaburan serantau berprestij yang menghimpunkan pemimpin ASEAN dan China.

Penyertaan Malaysia dalam CAEXPO 2025 akan memperkukuh peranan negara sebagai penyelar hubungan **Dialog ASEAN–China (2024–2027)**, di samping membuka ruang baharu kerjasama dalam pelaburan strategik, pembangunan infrastruktur serantau, bandar pintar dan inovasi teknologi hijau. YAB Timbalan Perdana Menteri akan mengetuai delegasi rasmi Malaysia dalam lawatan kerja ke Republik Rakyat China (RRC) dari 16 hingga 23 September 2025.

YAB Timbalan Perdana Menteri turut dijadual mengadakan pertemuan peringkat tertinggi dengan Naib Perdana Menteri China, H.E. Mr. Liu

Guozhong, yang menyelia Kementerian Sumber Air. Pertemuan ini akan memberi tumpuan kepada kerjasama strategik dalam pengurusan air, termasuk pertukaran teknologi, pembangunan kapasiti dan inisiatif lestari yang mampu memberi impak jangka panjang kepada kedua-dua negara.

Lawatan rasmi ini turut merangkumi Beijing dan Chongqing, dengan tumpuan terhadap tenaga boleh baharu, sistem storan tenaga, teknologi nuklear generasi baharu, serta pendekatan pengurusan air inovatif seperti model *Sponge City* untuk mitigasi banjir dan adaptasi perubahan iklim. Ia juga memberi penekanan terhadap sistem air pulih sebagai sumber alternatif industri, pembangunan loji bawah tanah dan menjana tenaga daripada biogas. Malaysia berhasrat memanfaatkan kepakaran dan pengalaman China dalam bidang ini bagi memperkukuh agenda nasional iaitu Pelan Hala Tuju Peralihan Tenaga Negara (NETR) dan Pelan Transformasi Air 2040 (AIR 2040) untuk strategi keterjaminan air dan tenaga negara.

Sejajar dengan kedudukan China sebagai rakan dagang terbesar Malaysia, lawatan ini berpotensi menarik pelaburan berimpak tinggi dalam sektor tenaga bersih, teknologi hijau, serta memperkukuh daya saing ekonomi negara. Sejajar dengan aspirasi Malaysia MADANI, ia juga melambangkan usaha Malaysia untuk memainkan peranan lebih besar dalam kerangka kerjasama ASEAN–China, serta kedudukan Malaysia sebagai rakan strategik yang proaktif, inklusif dan berdaya tahan di peringkat serantau dan global.

KEMENTERIAN PERALIHAN TENAGA DAN TRANSFORMASI AIR

16 SEPTEMBER 2025

Unit Komunikasi Korporat | Kementerian Peralihan Tenaga dan Transformasi Air (PETRA)
Tel.: 03-8000 8000 | E-Mel: ukk@petra.gov.my

